

petit frere pour le ietter au pour [*sc.* port] de falut, tant pour le corps que pour l'ame. Vn Pere paffant aupres d'une cabane fans entrer dedans, vne femme Sauuage luy dit en se plaignant. Je croy que tu ne nous aime plus, puis que tu paffe fans nous visiter: le Pere souffrit à cette plainte, entre dans la cabane, y trouue vne pauvre femme fort malade, qui luy dit, fied toy vn petit aupres de moy, car ie me meurs, puis en luy montrant son petit fils, elle luy demande la larme à l'œil, s'il ne voudroit pas bien feruir de pere au pauvre petit enfant qu'elle alloit laisser, le Pere la confola bien-toft, il fit emporter ce petit innocent pour estre esleué avec les autres, puis comme cette femme estoit baptisée, il l'enquist si elle ne feroit pas bien aise de se confesser des pechés qu'elle auroit commis depuis son baptesme, elle le fit avec tant de preparation, & tant de candeur, que le Pere demeura quelques iours comme estonné, voiant comme la Foy iettoit de profondes racines dans les ames de ces pauvres Barbares.

Quelque temps apres, vn Capitaine estant tombé malade, & ayant receu le sainct Baptesme, nous [33] donna sa propre fille âgée d'enuiron trois ou quatre ans, nous la faisons esleuer chés vne famille Françoisse, la mere de cét enfant ne la pouuoit quitter qu'avec peine, mais ce bon Neophyte la pressa tant qu'elle nous l'apporta elle mesme, cognoiffant bien qu'elle feroit mieux dans nos maifons Françoises, que sous l'une de leurs cabanes. I'obmets vn grand nombre de baptesmes, pour ne passer les limites que ie me suis proposé, encor qu'on y peut remarquer quelque chose de notable, quand ce ne feroit qu'une prouïdence de Dieu tres-particuliere. Par exemple, quel-